

# გამოცდების ჩატარების წესი

## მუხლი 1. ზოგადი დებულებები

ევროპის სასწავლო უნივერსიტეტის გამოცდების ჩატარების წესი (შემდგომში - „წესი“), ადგენს უნივერსიტეტში საგამოცდო პროცესის ორგანიზაციულ უზრუნველყოფას და მასში ჩართული პირების უფლება-მოვალეობებს.

## მუხლი 2. ტერმინთა განმარტება

დამკვირვებელი - პირი, რომელიც ახორციელებს გამოცდის ორგანიზაციულ უზრუნველყოფას.  
სტუდენტი - პირი, რომელმაც საქართველოს კანონმდებლობის შესაბამისად სწავლის უფლება მოიპოვა ევროპის სასწავლო უნივერსიტეტის საგანმანათლებლო პროგრამაზე;  
გამოცდის ჩატარებაზე უფლებამოსილი სტუდენტი - პირი რომელიც სწავლობს პროგრამით გათვალისწინებულ სასწავლო კურსს და შესრულებული აქვს უნივერსიტეტთან გაფორმებული ხელშეკრულების ნაკისრი ვალდებულებები.

## მუხლი 3. საგამოცდო პროცესის დამკვირვებლის ვალდებულებები

### 3.1 საგამოცდო პროცესის დამკვირვებელი ვალდებულია:

- ა) გამოცდის დაწყებამდე სტუდენტს გააცნოს წესები, რომლებიც უნდა დაიცვან გამოცდის მიმდინარეობის პროცესში;
- ბ) შესაბამის უწყისში რეგისტრაციაში გაატაროს სტუდენტები და ხელმოწერით დააფიქსირებინოს გამოცდაზე გამოცხადება;
- გ) თვალყური ადევნოს საგამოცდო დროის პერიოდში გამოცდის მიმდინარეობას და წინამდებარე წესით განსაზღვრული დარღვევის შემთხვევაში მიიღოს შესაბამისი ზომები;
- დ) საგამოცდო დროის ამოწურვამდე 10 წუთით ადრე გააფრთხილოს სტუდენტები საგამოცდო დროის ამოწურვის შესახებ;
- ე) გამოცდისთვის განსაზღვრული დროის ამოწურვის შემდეგ სტუდენტთა ნამუშევრები გადასცეს შესაბამის დეკანატს;
- ვ) უზრუნველყოს ნამუშევრების კონფიდენციალობის დაცვა.

## მუხლი 4. სტუდენტის უფლება-მოვალეობები

### 4.1 სტუდენტი ვალდებულია:

- ა) გამოცხადდეს გამოცდაზე საგამოცდო დროის დაწყებამდე 15 წუთით ადრე;
- ბ) გაიაროს რეგისტრაცია და შესაბამის უწყისში ხელმოწერით დააფიქსიროს გამოცხადება;
- გ) გამოცდის მიმდინარეობისას დაიცვას ეთიკის კოდექსითა და ამ წესით გათვალისწინებული ნორმები;

- დ) საჭიროების შემთხვევაში ხელის აწევით მიმართოს დამკვირვებელს შეკითხვით, ისე რომ ხელი არ შეუშალოს სხვა სტუდენტებს;
- ე) დაემორჩილოს საგამოცდო პროცესის დამკვირვებლის მითითებებს და გადაწყვეტილებას, თუნდაც მისი გამოცდიდან მოხსნის შესახებ;
- ვ) საგამოცდო დროის ამოწურვისთანავე დროულად ჩააბაროს ნამუშევარი;
- ზ) არ გაიტანოს საგამოცდო ოთახიდან შავი სამუშაო ფურცელი.

#### **4.2 სტუდენტს უფლება აქვს:**

- მოითხოვოს გამოცდისთვის სათანადო პირობები (სამუშო სივრცე, განათება);
- შეიტანოს ან მოითხოვოს საგამოცდო ბილეთით/ტესტით დადგენილი დამხმარე მასალა (კალკულატორი, კოდექსი, ტაბულა, რუკა და ა.შ.);
- საგამოცდო ოთახში შეიტანოს სასმელი წყალი;
- გამოცდის შედეგების გამოქვეყნებიდან ორი დღის ვადაში გაასაჩივროს მიღებული შეფასება შესაბამის დეკანატში.

#### **მუხლი 5. გამოცდების ჩატარების პროცედურები**

- ა) საგამოცდო რეგისტრაცია იწყება გამოცდის დაწყებამდე 15 წუთით ადრე. რეგისტრაციის დრო არ შედის საგამოცდო დროში;
- ბ) რეგისტრაციის გავლის შემდეგ სტუდენტებს ურიგდებათ საგამოცდო საკითხები/ტესტები;
- გ) დამკვირვებელი სტუდენტებს აცნობს გამოცდაზე ქცევის წესებს;
- დ) საგამოცდო დრო განისაზღვრება სასწავლო კურსის სილაბუსის შესაბამისად;
- ე) საგამოცდო დროის დაწყებიდან დაგვიანებული სტუდენტი გამოცდაზე დაიშვება 15 წუთის განმავლობაში. ეს დრო არ დაემატება სტუდენტის საგამოცდო დროს.

#### **მუხლი 6. გამოცდაზე ქცევის წესები**

##### **6.1 გამოცდაზე დაუშვებელია:**

- ა) საუბარი, ხმაური, ჟესტიკულაციის გამოყენება;
- ბ) სხვა სტუდენტისათვის ხელის შეშლა ნებისმიერი ფორმით;
- გ) სხვა პირებთან კონსულტირება ან ურთიერთობა აუდიტორიის გარეთ გამოცდის პერიოდში;
- დ) სხვა სტუდენტის ტესტში ან ნაშრომში ჩახედვა ან მისი გადაწერა;
- ე) სხვა პირის დახმარება, სხვისაგან დახმარების მიღება ნებისმიერი ფორმით;
- ვ) საგამოცდო დროის ამოწურვის შემდეგ, საგამოცდო მასალებზე რაიმე ჩანაწერების გაკეთება ან მუშაობის გაგრძელება;
- ზ) საგამოცდო მასალების გადაწერა, გადაღება მისი გარეთ გატანა ან გატანის მცდელობა ნებისმიერი ფორმით;
- თ) გამოცდაზე კალკულატორის ან ნაბეჭდი მასალის გამოყენება გარდა საგამოცდო საკითხით გათვალისწინებულისა. აღნიშნული განისაზღვრება მხოლოდ სასწავლო კურსის განმახორციელებელი პირის გადაწყვეტილებით;

- ი) დაუშვებელია მობილური ტელეფონების გამოყენება კალკულატორად;
- კ) დაუშვებელია შინაარსთან დაკავშირებული კითხვების დასმა;
- ლ) საგამოცდო ნაშრომის ჩაბარებამდე საგამოცდო ოთახის დატოვება დაუშვებელია ნებისმიერი მიზეზით, გარდა ჯანმრთელობის მდგომარეობით განპირობებულისა.

6.2 გამოცდის მიმდინარეობის დროს ნებისმიერი ელექტრონული საშუალება (მობილური ტელეფონი, ფოტო და ვიდეო კამერები და სხვა) უნდა გამოირთოს და მოთავსდეს მისთვის გამოყოფილ ადგილას;

6.3 საგამოცდო პერიოდის განმავლობაში ამ და სხვა გარემოებების დროს სტუდენტს ერთხელ მიეცემა შენიშვნა. მსგავსი ან იგივე დარღვევის შემთხვევაში მოიხსნება გამოცდიდან;

## **მუხლი 7. სტუდენტის გამოცდიდან მოხსნის საფუძვლები**

### **7.1 სტუდენტი გაფრთხილების გარეშე იხსნება გამოცდიდან:**

- ა) ლექსიკონის, ე. წ. „შპარგალკის“, მობილური ტელეფონის, აიპადის, კალკულატორის და დამხმარე მასალის, (გარდა ნებადართული შემთხვევისა) ან სხვა ელექტრონული ხელსაწყოთა აღმოჩენისას (თუნდაც გამორთულ მდგომარეობაში);
- ბ) წესრიგის დარღვევის ან საგამოცდო პროცესში მონაწილე პირის შეურაცხყოფის ან სხვა მსგავს შემთხვევაში;
- გ) ალკოჰოლის, ნარკოტიკული ან ფსიქოტროპული ნივთიერებების ზემოქმედების ქვეშ ყოფნის შემთხვევაში.
- დ) სხვა პირის ნაცვლად გამოცდის ჩაბარების მცდელობის შემთხვევაში.

7.2 ნებისმიერი სხვა წესის დარღვევისას სტუდენტი იღებს გაფრთხილებას. მეორე გაფრთხილების მიღების შემთხვევაში დამკვირვებელი ვალდებულია გამოცდიდან მოხსნას სტუდენტი.

### **7.3 ნაშრომი არ გასწორდება:**

- ა) სტუდენტი საგამოცდო დროის ამოწურვისთანავე არ შეწყვეტს მუშაობას და არ ჩააბარებს ნაშრომს;
- ბ) ნაშრომში დააწერს სახელს, გვარს (გარდა სპეციალურად გამოყოფილი ფურცლისა) ან გააკეთებს პიროვნების იდენტიფიცირების შესაძლებლობის შემცველ რაიმე ინფორმაციას, ან რაიმე სახის ისეთ გრაფიკულ გამოსახულებას, რომელიც დაკავშირებული არ არის საგამოცდო დავალებასთან;
- გ) სტუდენტის გამოცდიდან მოხსნის შემთხვევაში.

## **მუხლი 8. დასკვნითი დებულებები**

- ა) წინამდებარე წესი მტკიცდება რექტორის ბრძანებით;
- ბ) წესში ცვლილებები და დამატებები შეტანა ხორციელდება რექტორის ბრძანებით;
- გ) წესი ძალაში შედის ხელმოწერისთანავე.